



الراجل اللى بيهذى

شعر

عبدہ الزراع



كتابات جديدة

رئيس مجلس الإدارة
أ.د. سمير سرحان

رئيس التحرير
د. سهير المصادفة

مدير التحرير
السماح عبد الله

الإشراف الفني
مبى عبد الواحد

تصميم الغلاف
الفنان: سامى بخيت

مستشارو التحرير
د. عبير سلامة
د. ممدى توفيق
د. مصطفى الضبع
د. حاتم عبد العظيم

الإهداء :

* إلى صديقي الشاعر الكبير :

أحمد زرزور

لولا ما كانت هذه التجربة

فله هذا الديوان

وإلى أخوتي الأعزاء :

أولاد الزرّاع

عرفاناً ..

ومحبة ..

عبد

* صیاد عجوز *

صياد عجوز ...

قاعد ممدد رجليه المكرمشة

ع الشط

زهقان من منظر البحر المرمى

حواليه

بإهمال شديد

راكن بكوعه ع القارب القديم
اللى وكُلُه السوس
بيطلع آخر سجاره لفّ
كانت فى علبتُه الصفيح المصدية
اللى طلعتها من جيب الصدى
اللى ساكناه العتّه..
وبيدخن
بياخذ نفس طويل بعمق
وبيطرد تعب ٥٥ سنة
قضاها ع الشط ده
هو والقارب القديم
والشبكة والبحر والشط والصيادين
والنوارس البيضاء

اللى بتعمل حلقات فى السما
زى عُقد فُل فى رقبة بنت مَرْمَر
وبيعجه منظرهم
لما ينقروا بسرعة وش المية
ويهربوا على فوق
يسافروا لبلاد بعيدة
ما يعرفهاش
بيفتكر منظر قديم
مرّ عليه أكثر من ٣٥ سنة
وبيضحك بصوت هيسثيرى
مجنون
وهو بيشاور ع البحر
بيفتكر منظر الجنية

اللى طالعة لهُ فى القمرة الزاهية
فاردة شعورها ع المية
وعريانه خالص
وبتضحك له
كانت أجمل صورة بنت
شافتها عنيه
ويمكن البنت الوحيدده اللى شافها
عريانه فى حياته
كانت عماله تغطس.. وتُقبّ
وفجأة... اختفت

من يومها : وهو قاعد
ممدد رجليه المكرمشة
ع الشط

زهقان من منظر البحر
المرمى حواليه
باهمال شديد راكن بكوعه ع القارب القديم
اللى واكله السوس.. ويبدخن
ويبيص ع البحر بدهشة
وتعجب .

المصوراتي اللي صورني

أول صورة في حياتي

لمّا أخذني أبويا وقعدني

قدامه ع الدكه

في الشارع

وأنا لابس بيجامه

مقلّمه بالأخضر الزرعى
كان يمدّ ايديه
جوا الكاميرا اللى تشبه
جراب الحاوى
وأنا سرحان فى عالم سحرى
مليان بالأعاجيب
ينبهنى صوته..
وهو بيعد من واحد لتلاته
فأفنجلّ فى عنيه ..
وأبصّ ليمّ الكاميرا
باهتمام شديد
والناس عمّاله تمشى حوالينا
وبنتفرّج .. وبتضحك

وهو مركز ع الصورة
اللى لقطها من لحظة
كان لابس كساكته وبالطو
ونضارة قزازها سميك
وعيونه الغائرة فى جفونه
من تحت النضاره
بتضحك علطول
وملامحه ملامح فنان
بيحب التصاوير موت
لو حتى كانت فى الشارع
وسط الناس والدوشة
بكاميرته الفقراة..
وصوره الميه البهتانة

وأنا باصيص ع المشهد كله باستغراب
وكانى طاير..

فى عالم خيالى وفرحان
م المصوراتى اللى صورنى
أول صورہ فى حياتى
وعمرى ما هانساه
لأنه باسنى من خدى
وطبطب على كتفى بحنیه
وعطانى التصاوير بعدها بدقايق
وقاللى.. مبروك .

* سبحة أبويا *

لَمَّا هَلالَ رمضانَ بیدق الباب
ويطُلّ بنسِيمه على الدنيا
كانت تفرح سبحة أبويا البيضا
من فوق مسمارها المدقوق
في الحيط
تضحك من جوا القلب ..

وترقص وتغنى مع الأولاد
» وحوى يا وحوى .. إيوحا
رمضان جانا .. إيوحا،
تفرّك في جفونها النعسانة، وتُبصّ
على الدنيا وتتذكرّ :
رحلتها اليومية م البيت للجامع
وهى بتتطوح في أيديه ،
فتحس بحرية وطلاقة
والنسمة بتملس على جبينها
الناصع بالنور
فتزيد في جمالها، وبهاءها ، وجلالها
تصحى تتسحرّ ، وترتل
تواشيح الفجر

وتصلى وتنام فى سكينه .
وتقوم .. تتفرج ع الفوانيس بألوانها
الزاهية فى سوق القرية
وتخش فى نخاشيشها ريحة الكنافة
والقطايف ، ويعجبها منظر الكَنَاف ،
وهو بيلف فوق الصينيه المدورة
بكوزه المخروم
مبسوطه من منظر الخيطان
النازله دواير .
وتتذكر : لما ايدين أبويا
كانت بتلمسها بحنان
وهو بيتَمَتَم بالتساييح
بتشيف الروح

والقلب يزید فی خشوعه.. خشوع
ترفع فی عینیه الرایقین للسماء
تأمل فی نجومه المبدورة لالی
والقمر السهران ..
وبیعت ضیئه لكل الناس
والبنت الهمانة بعشق حبیبها
وبتبع أحلامها دوایر
للکون المشتاق للدفا والریح
والخلق القايمين للصلا
وبیقرأ القرآن بامعان .

*

دالوقت بیجی رمضان
والسبحة حزنة فوق مسمارها

ما عدتْش بترقص زى زمان ..
ولا عادت بتروح ع الجامع
ضاعت بهجة رمضان ، حتى الفوانيس
ما عدتْش بتلف شوارع قريتنا
والأولاد قاعدين قدام التلفزيون ،
ليلهم .. ونهارهم
نسوا ألعابهم ، وهزارهم ، وغناهم
حتى الكناف ما عدش بيلف
بكوزه المخروم
وتبص السبحة لفوق وتقول :
ضاعت أيامى
مع ذكريات رمضان
وأنا لما باشوف السبحة

وهى فى مسمارها المدقوق فى الحيط
بتذكر أبويا وهو فى طريقه للجامع
والسبحة بتطوح فى ايديه
فى حرية وطلاقة .

* الحَطَّاب *
* الحَطَّاب *

كان فيه وقت طويل
بين صوت الديك لما بيدن
ويعلن عن طراوة يوم جديد ،
وبين لما أسمع صوته وهو
بيتنحنج في الشارع
من دفء اللحظة .. أقوم

أفتح شبابيك الروح ، وأبص
لوشته الطيب
كان عوده طويل مقوس ..
زى هلال العيد ..
ويُبصّ لوشى المدهوش بالنوم
ويقوللى بخفة روح :
« خَشّ يا عكروت » نام
الشمس لسه ما طلعتش
فأضحك .. وأخشّ أنا
كان أنشف م الوتد
المغروس فى الأرض
وأجمد من حيطنا المبنى
بالطوب النىّ

كان أطيّب من ريح الفجر

*

لَمَّا يَشِيلُ المَعُولُ بِأَيْدِيهِ

وَيَلْفَ الحَبْلَ عَلَيْهِ

وَيَمْشَى فِي طَرِيقِهِ لِغِيطَانِ الْقَرْيَةِ

كَانَ لَمَّا يَبِيدُ عَنْ نَظَرِي

أَقْفَلَ ضَرْفَةَ شَبَاكِي

وَأَخْشَ أَنَامَ .

*

كان فيه وقت طويل

بين لَمَّا يَبْرُوحُ عِ الْغِيطِ

ولَمَّا يَرْجِعُ فِي الْمَغْرَبِ

شَايِلَ عَلَى ضَهْرِهِ حَزْمَةٌ كَبِيرَةٌ

م الحطب الناشف
يفتح باب بيته على وسعه
ويحط الحمل اللي حناه .

*

كان باله طويل
وروحه خفيفة وبريئة
زى الأطفال ..
يضحك للناس والدنيا
يجرى ويلعب ويانا ، ويشيلنا
على ضهره ويدوخنا ويقول :
« دوخينا يالمونه .. واديكي حنة
صابونة .. » ونرد وراه
كات أجمل لحظة بتمر علينا

وهو يلعب ويأنا
الناس كانت تحلف بحياة (الحطّاب)
ويحبوا يعاملوه
من أجل ضميره الحى .

*

دلوقت بأشوف (الحطّاب)
وهو قاعد على عتبة بيته
ومدد رجليه ع الآخر
ويبيصّ للدنيا بعيون حيرانه
ولا عدش بيروخ ع الغيط
ولا عدش حدّ بتعامل
وياه .. زى زمان
ويمرّ اليوم كله

والحطاب قاعد ما بيتحركش
مستنظر أى حد يدخل عليه
وأحياناً : تلاقى الدموع
نازله من عنقه
وبيتهيا لك إنها بدون سبب
لكنه ساعتها بيتذكر :
لما كان يروح الغيط ويجيب الحطب
والناس داخله وخارجة عليه
دالوقت بيقعد
طول اليوم لوحده
وأحياناً .. ما بيلاقش
قوت يومه
لكن عمره ما قفل باب بيته

دائماً مفتوح على وسعته
وكل ما أمرّ عليه أتذكرّ :
لما كان يبشيلنا فوق ضهره
ويدوّخنا ..
ولما كنت أصحى على صوته
وهو بيتتخنخ في الشارع
وأفضل أبصّ عليه
لحد ما يبعد
عن نظري
أقفّل ضرفة شباكي
وأخشّ أنا .

* أستاذى اللى علمنى الدرس *

أستاذى اللى كان بيعلمنى
ازاى أمسك القلم الرصاص
المقروض .. بصوابى النحيلة
وأشخط ببراءة وحرية
ع الورق الأبيض
وأردد وراه بحماس

النشيد اللى كان ديماً
يقوله لنا ..
وأقلّد اللى بيرسمه ع السبورة
على هيئة خطوط ودوائر
ما أعرفش تفسيرها
بعد ما علمنى أكتب أول حروف
اسمى ..
و « ألف باء .. يعنى أب »
ولما يمرّ علينا بكرشه الكبير ..
وابتسامته العريضة
ويتفرّج باستمتاع على رسم
الحروف فى الكراريس
ويطبّطّب على ضهرى بحنية

ويقوللى : شاطر
ويدينى صوبع طباشير ملّون هدية
هى دى كانت أول هدية
أخذها من أستاذى
اللى حبينى فى المدرسة
بعد ما كنت بأهرب
أنا والواد الشقى « سعد »
علشان نلعب الكورة الشراب
ونرجع ع البيت آخر النهار
شايلىن الشنط فاضيه
بعد ما اتسرقت الكتب منها
واحنا بنلعب
نزى دماغتنا الفاضيه من المعرفة

ولما ودّاني صديق أبويّا
المدرسة .. ودخلني الفصل
بعد ما خوفني بالعسكري
قابلني أستاذي بابتسامه
عريضه .. وماضربنيش
لكن طنّط عليه ..
وقاعدني في أول تختّه
واداني حّتة شكولاته
ساعتها حسيت بالأمان
والمسئولية
وقررت إني أكون شاطر
ولا أهربش
وبقيت أحب المدرسة

ودروس التاريخ
ولمّا كبرت شويه
عرفت إن الخطوط اللي ما كنتش
أعرف تفسيرها هي
خريطة مصر
وإن النشيد اللي كان دايما يقوله
واحنا نرده ورّاه
هو (بلادی .. بلادی .. لكی حبی
وفؤادی ..)
وإن بلادی دی هي

وبقيت أحب أستاذي جداً

وأحب المدرسة

وأحب سيد درويش

والكتابة

والكراريس

والكتاب المدرسي ..

وحصص الموسيقى

والجغرافيا ..

*

دلوقت بأشوف أستاذي

دائماً قاعد في فرندة بيته

بيبص للفراغ

أو ماسك كتاب يقرأ فيه
وباحسّ بالحنان تجاهه ..
وهو بيتأمل المشيين ..
وبيتمتّع ع السبحة اللى
مابتقرقش ايديه
ولما أمرّ عليه .. وهو قاعد
أقف أبصّ لوشته
اللى بأشوف فيه تعب
السنين الطويلة
وصوته اللى انتبجّ مع التلامذه
فى شرح الدروس
وخطاويه اللى ات رسمت فوق

بلاط الفصول ..

وأشوف خريطة (مصر)

وهي بتمرّ من قدامى

زى ما يكون شريط سينمائى

وأتذكر :

درس « الحملة الفرنسية »

أول درس فى التاريخ

شرحُه لنا

يومها سألنى :

من الذى قتل كليبر ؟!

قلت : سليمان الحلبي

وفضل الأستاذ يتكلم عنه

طول الحصه بحماس
يومها اتمنيت انى أكون
« سليمان الحلبي »
وأقتل الفرنسيين
والانجليز ..
واليهود ..

*

ولما يقابلنى
أستاذى فى الشارع
لازم أقف ، وأسلم عليه
وأفكر لحظة ما كان بيعلمنى
ازاى أمسك قلمى الرصاص

المقروض

بصوابعى النحيلة ..

وأفكرت : الصوبع الطباشير المثلون

اللى ادهولى هدية

وصوابعه الطويلة وهى بتطبطب

على بحنية .

*

هو ده أستاذى

اللى علمنى الدرس

وفهمته كويس

وهو . دالوقت بيقرا

فى وشى

إن أنا تلميذه النجيب
وبيسلم علىّ بحرارة
وبييتسم في وشيّ
زى زمان
وكانه بيتذكر :
ماضى جميل .

* الراجلّ اللى بيهذى *

الراجل النحيل
اللى من أكثر من عشر سنين
كل ما بيعدى
على فى الشارع
ألقاه بيهذى بكلام
ميش مفهوم ..

بهدومه المتقطعة ..
وعيونه الزايغة
ودائماً كان ييعمل حركات
بهلوانية ..
فأقف أتفرّج عليه
وأطلع له لسانى
وأعفر وشه بالتراب
فيضحك بشكل هستيرى
ويجرى ورّايا
ويعمل قطر سكة حديد
« تَكْ .. تَكْ .. تَكْ .. تَكْ »
ولما يحصلنى ..
يجرى من جنبى .. ولا يمسنيش

تضحك ستي الحاجة وتقوللى :
ياواد .. سيّب (زكريا) فى حاله
والنبي سره باتع .

*

إمبارح بسّ
وأنا ماشى فى شارع التحرير
شفت راجل هدومه
مقطعة
وماسك فى ايده عصاية
وبيضرب بيها الماشين
فى الشارع
ولا بيضحكش ..
والناس مفزوعه وبتجرى

مَشَّ عارف ليه فاكرنى
بالراجل اللى من أكثر من عشر سنين
كان بيعدى على
فى الشارع
وبيهذى بكلام مش مفهوم
ودايماً يجرى ورايا
ويعمل قطر سكه حديد
« تَكْ .. تَكْ .. تَكْ .. تَكْ »
ولما يحصلنى يضحك
ولا يضربنيش .

*

* صاحبی *

صاحبى اللى كان
بيمشى فى شوارع القاهرة
بيحضن الفراغ
ويطوح دراعاته بوسع الكون
بيغنى أغاني بعلو الصوت
وبيلأغى الشمس فى عيون البنات

وبيرسم أحلامه الجموحة
على رنة كعوبهم
بيحب فيهم شعرهم
لما يكون هفاهف
بيبعث ملامح نجمة كانت
مختفيه في ليل غامض
لحبيبتة في أول جواب
غرامى كتبها
لما شافها زى القمر
بين صاحببتها في الجامعة
وهي بتحضن الكتب بحنان
قلبه طار عصفور طليق
في الفضا ..

حضن السما والناس
يومها ألقى قصيدة شعر
في فلسطين ..
وأطفالها اللي بيحاربوا اليهود
نزلت دموعها على خدها
تغسل في حزن العرب
وتضمد جراح الجنوب
وتحضن أطفال العراق
*

هي دي حبيبته
اللي كان بيقرأ أفراحه
وأحزانه في عيونها
هي دي حبيبته (الأمينه)

اللى كانت بتشاركه
سره وبوحه ، صحوه وموته
لما بيثوف :
طفل نايم ع الرصيف
أو تحت الكوبرى فى ميدان
« عبد المنعم رياض »
هى دى حبيبته
اللى كانت بتحب قسايد
وتقعد تردددها معاه ..
وهى اللى شاهدت ضحك
الهستيرى فى الشارع
أو بين صحابه فى قهوة البستان
وهى دى اللى كانت بتشاركه

الآلم والجوع .. وفرحة الكتابة

.....

وهو ده صاحبي

اللى كان بيحلم بالدفا والبيت

وصوت ملايكي يقول

(بابا)

وهو راجع ..

شايل الأحلام معاه .

*

دلوقت صاحبي

بيقابلنى بالصدفه

فى ميدان (طلعت حرب)

بيكلم الفاترينات

وبيشهد الأسفلت على خطاويه
هو وحببيته اللي ضاعت منه
فى زحمة الحياة
ولما بيلمح صاحبه
(صادق شرشر) من بعيد
بيجرى .. وياخذه بالحضن بحرارة
زى ماكان بيحضن حببيته
فى ليل الشتا
يفضل يحكى له عن همومه
وأحزانه
وحلمه اللي اتكسر
على أول الطريق .

*

هو ده صاحبي اللي كان
مايعرفش للحن مكان
ولما بيحكى لي حكايته
باسمع باستغراب ودهشه
وأقول :

ممکن تخون الحبيبہ ..

الحلم والحياة
وتبقى ماضى أليم
لما نتذكره يأذى المشاعر
ويصعب على صاحبي
بعد ضحكه ما نطفى
وهو بيقابل الحياه
بوش حزين

وقلب كسير ..
وما عدش بيحب البنات
ولا عدش بيغنى فرايحي .
حتى غناه أصبح حزين
ولا عدش بيلاغي الشمس
في عيونهم ..
ولا عدش بيحلم بالدفا والبيت
بعد باب الحب
ما اتقفل في وشه
حتى كلمة (بابا) كمان
اللى قعد يحلم بيها
سنين طويلة
برضه اتحرم منها

ولاعدش ليها مكان في حياتهُ

*

هو ده صاحبي

اللى قابل حبيبته

بالمصادفة

ولا حسش بأى شىء ..

ولا قلبه رفرف زى عصفور

وانطلق

حتى الكلام

كان بيهرب من شفايفه

وملقاش أى رغبة

يحكى لها زى زمان

عن هموم الوطن ..

والناس
ولا حتى عن همومه الشخصية
وملقاش عندها أدنى استعداد
إنها تسمع أى
شئ ..
كان لقاء فاتر
وعابر
وردها كان باختصار
شديد جداً
أنت حُرّ .

*

هى دى المأساة
لما تشعُر إن روح واحدة

وتتقسم ضدين
ساعتها تشعر إن الكون
كابوس
مخيف .

*

هو ده صاحبي
ودي حبيبته اللي
ضيعة
وضاعت معاه
فى زحمة
الحياة
ولاعدتش تلفّ عليه
فى الشوارع

تسأل الفاترينات ، والعريبات
والناس

ولا بتروح القهاوى اللى كان
بيقعد عليها

تسأل الصحاب عليه

وتلحّ فى سؤالها

عن شاعر بيكتب قصايد

بحبر من دمه

ضيعته من ايديها

وضاعت معاه

هى دى مأساة

صاحبى الحقيقة .

*

٩٩ / ٣ / ٤

* العریجی *

كان سواق العربية الكارو

بجلابيته الكستور ..

يقعد .. ويمدد رجليه

ماهو أتخن من عم «جاهين»

وخياله زى خيال الشعرا

لما يشد الصرّع بايديه ..

ويصفر لخصائمه
وبصوت عالي يقوله «شيء .. شيء»
ويدندن بأغنية «عبد الوهاب»
«يامسافر وحدك وفايتتى .. ليه
تبعد عني !..»
كان صوته حزين ..
رغم البسمه المرسومه على وشه
وساعتها نبصّ لبعضينا ..
ونغنى
«ياسواق العربية .. ودينا
ع التل العالي ..»
لما بيضحك .. ضحكه يجلجل
ويبصّ على الدنيا بنظره طفل

بريئة ..

ويقول : الله !!

شايفين يا ولاد : قَدْ ايه

الدنيا جميلة

بسّ الفرحة متخفية فى ليل الحزن

شايفين : النّوّار الأبيض اللي

مزهّر فى الناحيا دى

والفلّ مع الياسمين الطازة ،

والريحان .. بينادوا عليكو

ويقولوا : صباح الخير ..

يا براعم خضرة

شايفين : العصافير وهما بيلتقطوا

الجرن القمحة

ويطيروا ..

شايقين : السمك بلونه الفضى

وهو بيضوى تحت الشمس

فى شباك الصيادين ،

فرحان بيتلعبط وينادى

على الحرية .

شايقين : الطياير الورقية الملونة بألوان

تدهش .. طاييره بتتباهى

فى سماء الحارة .. والأولاد

المقاريض ، وهما بيععتوا

عبر الخيط مراسيل ، علشان

ترد عليهم فياخذها الريح

ولا ترجعش إلا مع المغرب

لَمَّا يَشْدُوا الْخِيَطَ وَتَبَاتَ فِي
حُضْنُهُمْ .. بَعْدَ مَا فَرَحْتَ بِالطَّيْرَانِ .
وَتَصْحَى مَعَ الصَّبْحِ الطَّارِحِ حَوَادِيتِ
وَحَكَاؤِي جَدِيدَةٍ .

شَايِفِينَ : الْقَارِبِ الْمَكْسُورِ الْمَرْكُونِ ع

الشَّطِّ نَائِمٍ وَحَزِينٍ .. مُسْتَتِي
أَيْدِينَ الصِّيَادِينَ السَّمَرَا الْعِرْقَانَةَ
مِنْ وَهْجِ الشَّمْسِ .. عَلَّشَانِ
تَعِيدُ الرُّوحَ لِكَيَانِهِ .. وَيَنْزِلُ فِي
الْبَحْرِ مِنْ تَانِي .. مُشْتَاقٍ
لِلشَّبِكِ وَالْمَجَادِيفِ ، وَالسَّمَكِ
، وَالْمَوْجِ ، وَالرَّيْحِ ، وَلِنَسْمَةِ
الْفَجْرِ لَمَّا تَخْشَى فِي نَخَاشِيشِهِ

فَيَنْتَعِشَ .. ويحب الحياة ويدمنها

من جديد .

شايقين : الصيف الحرّان .. والعود الدبلان

في غيطان القيالة .. وطراوة

العصرية .. وعيننا بتتادى ع القلّه

في الشبابيك وهي سهرانة

مع ليل الحب .. وصوت الناي

لما يطلع مع دخان الركبة اللي

بتسوّى الشاي .

شايقين . ياولاد .. شايقين

نسرح بخيالنا .. ونتوه في كلامه

العنب

وتنسى ضحكنا.. وألعابنا .. وهزارنا

وغنانا ..

وفجأة : نلقانا وصلنا عند التلّ

فيشد « العرجى » الصرّع بقوة ،

ويقول : « هيسّ .. »

ننزل زى نجوم اتبدرت ع الأرض

نجرى .. ونطلع فوق ع التلّ

نلعب كورة .. وعسكر وحرامية ..

والحجلة ..

نطلع فوق شجر الصفصاف ..

والتوت الأغيش .. والجميز ..

نصطاد العصافير بالنبلّ ..

ونسابق بعض .. ونتدحرج

من أعلى التلّ .. لحدّ الأرض

ونعيد الكرّه من تانى
نفضلّ نتشاقى طول اليوم
لما الشمس تغيب
نُبصُ على حدود الشوف
فنلاقى « العرجى »
جاي بعربيته « الكارو »
من بعيد .. بينادى علينا ويقول :
« ياللا يا أولاد .. بقينا المغرب ..
ياللا ع المرواح .. قبل الليل
مايخشّ علينا ... »
ننزل من فوق التلّ نتسابق
زى الصواريخ .. ونركب ع العربية
واحنا بنغنى ونقول :

« ياسواق العربية .. ودينا ع المعدية »
وهو بجلابيته الكستور ..
قاعد ع العربية .. وممدد رجليه
وبيغنى للحياة .. غنيوه جديدة
بوش بشوش .. وعيون فرحانة
ماهو اتخن من « عم جاهين »
وخياله زى خيال الشعرا .

*

١٩٩٩ / ١ / ٢

* الزَّراع *

مرثية إلى روح والدى الطاهرة ..
محمد الزَّراع .

شايك ..

وانت بتعدى من باب الخوخة لعتبة
الدكان

والشمس متعامدة

على قزاز الفترينة ..

فترد الباب

بشويش

تسحب في الكرسي الخزان
وتبصّ على الشارع بعيون سرحانة
العصافير بتزقزق ..
على عُرِشة « أم خليل »
تقعد ..

وعنيك بتشب
ع الحيطّة المشروخة
وواصله لحدّ الأرض ..
تتأمل أرفف دكانك
تتصعب ..

وتميل ع الفترينة
تعدّ .. في زراير

وَكُلْف ..

وَسْتَان ..

وَايِر ..

وَأَشْرِبَات ..

وَمَشَابِكُ بَنَاطِلَات ..

وَخَيْطَان ..

وَقَزَائِر رِيحَة ..

وَزَيْتُ شَعْر ..

تَحْسَبُ فِي وَرَق ..

وَتَبْصُرُ لَفُوقَ

وَتَقُولُ :

سُبْحَانَكَ

*

شايك ..

و «مُنة» بتناولك كُباية الشاي

وانت بتضحك لها

من قلبك ..

ضحكة كيف صُبح اليوم

الطازة

وتبص ف غنيها .. بحنان

وتقول لها :

شكراً .

*

شايك ..

وانت بتفتح مصحف روحك .. على

سورة « الفاتحة »

سامعك ..
وانت بترتل
فى «تبارك» .. و «ياسين» ..
و «الواقعة»

زبتتهى ..
ب «الكوثر» .

*

على صوت دوشة
فى الشارع
وزعيق
نسوان بتصوت ..
وعيال بتخبط فى ببيان ..
وكلاب بتهو هو ..

نجرى ونُبص من الشبابيك
ونفتح في الأبواب
وانت في مكانك ..
مايهزك إلا قرآن الصبح
والسبحة البيضاء .. كيف قلبك
في إيديك
بتعد عليها الخير
للناس ..
وتقول :
الله يهديهم
*

سامع ..
« مريم » بتقول « لضحي »

ياللا يابِتْ بقينا الضُّهر
أنا شايفه « الزَّرَّاع »
بقاله شويه
رايح ع الجامع
*

لما المطرة ..
كانت تنقُرْ في الشبابيك
كان قلبك يابا
يكركبُ
وتبُصّ لأمي وتقول :
مِشْ قولتك ..
الدنيا هاتشتي
والسطح بقاله كتير

مانضِفْشَ .

*

كانت تجمعنا اللّمة
جنب وابور الجاز
والريح بيصفّر في الشار
والدنيا عماله ترخّ
واحنا تحت البطاطين
بنتقتق م البرد ..
كتاكيث مرعوشة
ناكل في سودان ..
ونشرب شاي ..
وانت بتحكي لنا
يابّا ..

عن جدى « القطب »

ومغامراته

مع العمدة

وسيتك « هانم »

لما كانت بتخليك

تلف كل حوارى القرية

والشمس فى عزّ الضهر

بتلفح وشّ الناس

علشان تقشّش

منها القشّ

وتبيعه ..

لخلق الله

وهى تقبض ..

تملأها المية
م النيل
فى البلاص
وتصب فى الزير
علشان تشرب ..
وتمزميز
وانت تمام ..
مهدود الحيل .
*

ليه يابا
ساهيتتى ومشيت
د أنا حتى ماودعتكش
د أنا سينك

بمق

ورحلت

انت ما پینا

بتيجي و تطوف

على بيتنا
حارسه بيانا وشبابكنا
بتخش ما بينا
تفرح لفرحنا
روحك فرحانة ..
يا « زراع » !
روحك مبسوطة
بتمس على وش
« حمادة »
وتداعب « كريمان »
و « ندا »
روحك مبسوطة
يا « زراع » !

روحك مبسوطة
.. لكن سهيتتى
ومشيت ..
ليه يابا
د أنا سبتك فى البيت
ولا ودعتكش ..
ولا ..
ودعتكش .

الفهرس

٥	١- الإهداء
٧	٢- صياد عجوز
١٥	٣- المصوراتى
٢١	٤- سبعة أبويا
٢٩	٥- العطاب
٣٩	٦- استاذى اللى علمنى الدرس
٥٣	٧- الراجل اللى بيهذى
٥٩	٨- صاحبى
٧٣	٩- المريجى
٨٥	١٠- الزراع

نبذة عن الشاعر:

- شاعر وكاتب أطفال
- عضو اتحاد كتاب مصر
- مدير تحرير مجلة قطر الندى
- صدر له للكبار:

١- البندق طاش رشاش على شعري - إبداعات - ١٩٩٦ هيئة قصور الثقافة .

٢- آخر حكايات سهرانة - الجوائز - ١٩٩٩ هيئة قصور الثقافة

- صدر له للأطفال:

١ - رسمنا وردة - قصائد للأطفال - كتاب قطر الندى - ١٩٩٦ هيئة قصور

الثقافة

٢ - ليلة مولد النبي - حكايات شعبية للأطفال - كتاب الهلال للأولاد والبنات

- ٢٠٠٠

٣ - أراجوز فنان - قصائد للأطفال - كتاب قطر الندى - ٢٠٠١ - هيئة

قصور الثقافة

مطابع الهيئة المصرية العامة للكتاب

رقم الإيداع بدار الكتب ٥٥٣٢ / ٢٠٠٣

I.S.B.N 977 - 01 - 8450 - 0